

Nyumba ya Haki ya Ulimwengu

26 Desemba 1995

Kwenye Kongamano la Bodi za Washauri wa Bara

Marafiki Wapendwa,

Mpango wa Miaka Minne

Mashauriano yetu juu ya Mpango wa Miaka Minne yamenufaika kwa kiasi kikubwa sana kutokana na uchambuzi ulioandaliwa na Kituo cha Ufundishaji cha Kimataifa kwa ajili yetu juu ya hali katika Ulimwengu wa Kibahá'í, tukokana na mwingiliano wake usiokoma na Washauri katika uga wa utendaji, na kutokana na majadiliano yetu yaliyofuatia na shirika hilo. Inatupa furaha kubwa kushiriki nanyi mwanzoni mwa kongamano hili sura za jumla za Mpango. Tunawaalika kuweka umakinifu wenu katika siku zijazo kwenye masuala yanayohusiana na utekelezaji, mkichota juu ya umaizi na maarifa yaliyopatikana kutoka miongo kadhaa ya tajiriba kote ulimwenguni.

Vipengere fulani vya uamuzi na maoni yetu juu ya Mpango vitakuwa na matokeo ya moja kwa moja kwenye jitihada zenu katika muhula wenu wote wa sasa wa huduma. Hivyo ni: umakinifu mkubwa kwa Mpango unaokuja; mchakato tunaoutaamali kwa ajili ya uchanganuzi wa Mpango na nafasi yenu katika mchakato huu; maendeleo katika mtindo wa utendaji wa Bodi za Washauri wa Bara; uandaaji wa mipango katika ngazi za kitaifa, kanda na mahali; hitaji muhimu kwa taasisi kufunza waumini na kukuza rasilimali watu; uhusikaji wa karibu kabisa wa Washauri na Washauri Wasaidizi katika uanzishwaji na utendaji wa taasisi hizi; mbinu zenye kufaa za kuanzisha na kuimarisha Mabaraza ya Kiroho ya Mahali na maendeleo ya jumuiya ya Kibahá'í ya Mahali; na uelekezaji wa rasilimali finyu za fedha kwenye changamoto nyingi zinazozikabili jumuiya ya Kibahá'í.

Kwenye Ridván 1996, Wabahá'í wa ulimwengu wataanza shughuli ya kiulimwengu ikilenga kwenye ufanikishaji wa jambo moja kuu: uendelezaji wa maana katika mchakato uingiaji kwa makundi. Hii itapaswa kutimizwa kupitia maendeleo yanayoonekana katika shughuli na maendeleo ya muumini binafsi, ya asasi na ya jumuiya ya mahali. Ni dhahiri Kwamba maendeleo katika mchakato huu hutegemea juu ya maendeleo ya washiriki wote watatu wanaohusiana kwa karibu kabisa. Miaka minne ijayo lazima ishuhudie musukumo wa shauku ya nguvu katika shughuli za ufundishaji wenye ufanisi ukifanywa kwa ari ya mtu mmoja mmoja. Maelfu kwa maelfu ya waumini watahitaji kusaidiwa kuonesha nguvu ya utendaji wa imani yao kupitia uthabiti katika ufundishaji wa Hoja na kwa kuunga mkono mipango ya asasi zao na jitihada za jumuiya zao. Wanapaswa wasaidiwe kutambua kwamba jitihada zao zitadumishwa kwa kiwango ambacho maisha yao ya ndani na tabia binafsi “huakisi katika sura zake mbalimbali wangavu wa zile kanuni za kudumu zilizotangazwa na Bahá'u'lláh.” Uchapuzaji katika mwendo wa ufundishaji wa mtu binafsi lazima kwa vyovyote ukamilishwe kwa uzidishwaji wa idadi ya miradi ya ufundishaji ya ngazi ya kanda na mahali. Kwenye hatma hii asasi zinapaswa zisaidiwe katika kuongeza uwezo wao wa kushauriana kulingana na kanuni za Kibahá'í, kuwaunganisha marafiki katika mtazamo mmoja, na kutumia vipaji vyao katika huduma ya Hoja. Zaidi, wale wanaoingia katika Imani lazima wajumuishwe katika jumuiya hai ya mahali, inayobainishwa kwa uvumilivu

na upendo na kuongozwa na hisia thabiti ya kusudi na nia ya pamoja, mazingira ambamo uwezo wa wahusika wote—wanaume, wanawake, vijana na watoto—unakuzwa na nguvu yao kuzidishwa katika vitendo vya pamoja.

Mchakato wa Upangaji

Mwishoni mwa kongamano hili, tunadhamiria kuutangazia ulimwengu wa Kibahá'í uamuzi wetu wa kuzindua Mpango wa Miaka Minne kwenye Ridván 1996. Upangaji wa mipango ya kitaifa unatakiwa kuanza katika kila Nchi baada ya Ridván, kuwaruhusu marafiki kuelekeza nguvu zao katika miezi iliyo katikati ili kuuleta Mpango wa Miaka Mitatu kwenye hitimisho lenye mafanikio.

Mawazo yalizoelezwa katika tangazo la awali yatafafanuliwa zaidi katika jumbe wa Ridván zijazo. Zaidi, tumeamua kuandika jumbe kwa waumini katika kila bara ulimwenguni, au sehemu zake, kuchunguza matokeo ya Mpango wa Miaka Minne kwa kuangazia hali mahususi za nchi zao. Baada ya Ridván, ingefaa kufanya mikutano ya kiushauriano baina ya asasi na Pamoja na wasaidizi thabiti wa Imani katika kila nchi na kupanga mipango ya kitaifa ndani ya kipindi cha miezi michache. Mara mashauriano kati ya Washauri na Baraza la Kiroho la Kitaifa juu ya maelekezo ya mpango yapofika mafanikio, utekelezaji wake unaweza kuanza. Uidhinishwaji wa mipango hii kutoka Makao Makuu ya Ulimwengu ya kibahá'í hautakua wa lazima; hata hivyo, nakala zinapaswa kutumwa kwake.

Malengo saba yaliyoainishwa kwa ajili ya Mpango wa Miaka Sita na Mpango wa Miaka Mitatu yanaelezea mchakato inayoingiliana ambayo ni lazima isonge mbele sawia kwa miongo mingi. Yataziona asasi wakati ziwekapo malengo katika maeneo mbalimbali ya shughuli ili kuendeleza zaidi shabaha ya Mpango wa Miaka Minne. Mipango ya kitaifa, hata hivyo, itahitaji kwenda mbali zaidi ya kuorodhesha malengo pekee yake ikijumuisha uchambuzi wa mbinu zitakazotumiwa na njia za utekelezaji zitazofuatwa, ili kwamba marafiki watakuwa na uwezo wa kuanza kwa jitihada zao kwa uelewa bayana na uwezo wa kufanya maamuzi.

Ngazi ya Bara

Katika kutekeleza majukumu yao muhimu wakati wa Mpango wa Miaka Minne, Bodi za Washauri wa Bara zitakuwa na uwanda mpana wa uwezekano uliopo kwao. Unyumbulikaji wa asili katika utendaji wao lazima utumike kikamilifu katika wakati huu ambapo matukio ya ndani na nje ya jumuiya ya Kibahá'í yanaenda kwa kasi iliyochapuzwa.

Kazi fulani za Washauri, zikiwemo usimamizi na kuwaongoza Washauri Wasaidizi wa eneo husika, kwa jumla hufanywa vizuri zaidi na Mshauri mmoja kwa niaba ya Bodi. Hata hivyo, katika utendaji wa kazi zingine, kuna thamani kubwa katika uanuwei wa mbinu na katika ushauriano miongoni mwa Washauri kadhaa. Kwa mfano, katika kuyachochea Mabaraza ya Kitaifa, katika kuendeleza ufundishaji miongoni mwa matabaka mbalimbali ya jamii ya watu na katika kutoa ushauri wa mambo mbalimbali ya jumuiya ya Kibahá'í, matokeo mazuri hupatikana pale uwezo wa idadi kadhaa ya Washauri unapotumika kwa namna ya kukamilishana. Njia na nyenzo zaidi inapaswa ibuniwe na kila Bodi ya Washauri wa Bara ili kuyawezesha Mabaraza na jumuiya kunufaika, kwa kiwango kinachofaa, kutokana na vipaji mbalimbali vya Washauri. Hii vile vile inaweza kuhusisha ushauriano wa kina wa mara kwa mara miongoni mwa kundi la Washauri juu ya hali na mahitaji ya nchi katika eneo maalum la bara kwa kuwa, kwa jumla, mazingira hayaruhusu mashauriano kama hayo yafanyike mara kwa mara miongoni mwa wajumbe wote wa Bodi.

La msingi kwa kazi za Washauri ni uelewa kwamba wajumbe wote wa Bodi ya Bara wanawajibika kwa bara zima, na lazima kwa kiwango kikubwa iwezekanavyo, wajitahidi

kujifahamisha hali za Hoja katika nchi za bara walilomo. Kupitia taarifa za mara kwa mara kutoka kwa Mshauri mmoja mmoja, Bodi hufahamishwa juu ya maendeleo katika maeneo yote ya bara na inaweza kutoa muongozo ili kuwasaidia wajumbe wake katika utekelezaji wa majukumu yao. Ambapo hakuna Mshauri anayepaswa kufikiriwa kuwa na wajibu wa kipekee kwa nchi yoyote mojawapo, ufahamu wa kina anaoupata kila mmoja kupitia mwingiliano wa karibu na Baraza la Kiroho la Kitaifa na Washauri Wasaidizi katika eneo maalum kwa kweli ni rasilimali yenye thamani kubwa sana kwa Washauri wote wa Bodi.

Sura nyingine ya kazi ya Washauri ambayo hustahili uzingatiwaji zaidi ni mwingiliano baina ya Washauri wa Bodi tofauti tofauti ambao huhudumu kwenye maeneo yanayokaribiana au ambayo yana uhusiano maalum. Miongoni mwa mifano ambayo huja akilini ni Shirikisho la Urusi, ambalo kwa sehemu lipo Ulaya na sehemu lipo Asia; jumuiya za Kibahá'í kitaifa za ncha ya dunia; nchi zinazopakana na Bahari ya Mediteraneani; jumuiya za Kaskazini-Mashariki mwa Asia na Antipodes, iliyotajwa na Mlinzi kuwa inaunda mhimili wa kiroho; nchi zinazozungumza Kiarabu za Afrika Kaskazini na Msahriki ya Kati; na nchi zinayozungumza Kifaransa katika mabara mbalimbali.

Tunatumaini kwamba, wakati bado wakiwa katika Nchi Takatifu, kila Bodi itaweza kuzingatia namna yake ya utendaji na kuchunguza njia zinazofaa za uchangamano miongoni mwa Washauri. Kwa namna hii, kati ya kumalizika kwa kongamano hili na Ridván, makundi ya Washauri yataweza kushauriana pamoja kuhusu mchakato wa upangaji kwa nchi kadhaa zinazohusiana na juumu ambalo wao na wasaidizi wao wanayo katika hili.

Ngazi za Kanda na Taifa

Katika nchi nyingi, mara vipengere vikuu ya mpango wa kitaifa vinapokuwa vimeainishwa, inafaa kwamba mchakato wa upangaji usonge mbele kwa haraka hadi kwenye ngazi ya kanda. Mipango itakayotokea inapaswa ijumuishe maelekezo kwa ajili ya kukuza ufundishaji wa mtu binafsi, uzinduzi wa kampeni za aina mbalimbali, ufanyaji wa makongamano, uanzishaji wa miradi ya mahali na kanda, uimarishaji wa jumuiya za mahali na mjongeo wa walimu wasafiri. Zaidi, usambazaji mkubwa wa vitabu na zana za vielelezo vya kusikia na kuona lazima upewe uangalifu wa haraka, na hususani katika maeneo yenye kiwango kikubwa cha upanuzi, uendelezaji wa rasilimali watu lazima kiwe kipengele cha msingi cha mipango ya kanda na kitaifa.

Wakati wa Mpango wa Miaka Tisa, Nyumba ya Haki ya ulimwengu ilitoa wito kwa Mabaraza ya Kiroho ya Kitaifa katika nchi ambako upanuzi wa kiwango kikubwa ulikuwa unatokea kuanzisha taasisi za ufundishaji ili kukidhi mahitaji ya uimarishaji ya maelfu ambao walikuwa wakiingia katika Imani. Wakati ule, msisitizo ulikuwa juu ya kupata jengo halisi ambalo kwalo kikundi baada ya kikundi cha waumini wapya wangealikwa kuhudhuria kozi za kujiimarisha. Baada ya miaka, pamoja na taasisi hizi, na agharabu zikiwa huru navyo, idadi kadhaa ya kozi—zikirejewa, kwa mfano, taasisi za mwisho wa wiki, taasisi za siku tano na taasisi za siku tisa—ziliendelezwa kwa kusudi la kuwasaidia marafiki kupata uelewa wa kanuni za kimsingi za Imani na kuinuka kuitumikia. Jitihada hizi zimechangia kwa kiasi kikubwa kwenye usitawishaji wa maisha ya kiroho ya waumini na bila shaka zitaendelea siku zijazo.

Pamoja ongezeko katika idadi ya uandikishaji, imekuwa dhahiri kwamba kozi kama hizo za mara moja moja za ufundishaji na Shughuli zisizo rasmi za maisha ya jumuiya, ingawa muhimu, hazitoshi kama njia ya uendelezaji wa rasilimali watu, kwa kuwa matokeo yake yamekuwa ni kuleta kikundi kidogo tu cha wasaidizi wa Hoja. Waumini hawa, haijalishi wamejitoe kiasi gani, haijalishi kwa kiasi gani wako tayari kujitoa dhahibu, hawawezi kukidhi mahitaji ya mamia, zaidi maelfu, ya jumuiya changa. Umakinifu uliopangiliwa unapaswa utolewe na asasi za Kibaha'i kwa

ufunzaji wa idadi ya maana ya waumini na kuwasaidia katika kuhudumia Hoja kulingana na vipaji na uwezo walipewa na mungu.

Uendelezaji wa rasilimali watu kwenye kiwango kikubwa huhitaji kwamba uanzishaji wa taasisi utazamwe kwa mtazamo mpya. Katika kanda nyingi, imekuwa muhimu kuunda taasisi kama miundo ya kimashirika iliyojikita kwenye mafunzo yenye mpangilio. Kusudi la mafunzo kama hayo ni kuwajaalia idadi iongezekayo isiyo na hakika ya waumini umaizi wa kiroho, maarifa na ujuzi vihitajikavyo ili kutekeleza kazi nyingi za upanuzi na uimarishaji uliochapuzwa, ikiwemo ufundishaji na uimarishaji wa idadi kubwa ya watu—watu wazima, vijana na watoto. Kusudi hili linaweza kutimizwa vizuri zaidi kupitia mpangilio mzuri, program rasmi zikihushisha kozi ambazo zinafuata mtaala wakufaa uliobuniwa.

Kama wakala wa Baraza la Kiroho la Kitaifa, taasisi za mafunzo zinapaswa zipewe kazi ya ukuzaji wa rasilimali watu katika sehemu au nchi nzima. Mahitaji ya upanuzi na uimarishaji katika nchi au kanda ndiyo yatakayoamua utata wa mfumo wake. Katika mazingira fulani fulani, taasisi inaweza kuwa na kikundi cha waumini waliojitoa wakiwa na program iliyopangiliwa vyema na mipangilio ya kiutawala ambayo huiwezesha kutoa kozi za mafunzo za mara kwa mara. Katika hali nyingi, Zaidi ya kikundi cha walimu kinachohusika nayo, taasisi itahitaji wafanyakazi wa muda na wa wakati wote, ambao usaidizi wao kutoka mifuko ya Imani unaweza kuwa wa lazima. Taasisi huhitaji upatikanaji wa majengo ambapo inaweza kuendesha mafunzo yake, na kwa kiwango fulani cha maendeleo yake, inaweza kuhitaji jengo lake yenyewe. Bila kujali kama taasisi ina majengo yake ama la, walimu wake lazima watoe kozi katika maeneo yote mawili, katika eneo la katikati, na vijijini na mijini ili kwamba idadi ya kutosha ya waumini iweze kuingia katika program zake. Utata na idadi ya kozi zinazotolewa na taasisi, hali kadhalika idadi ya wafanyakazi wake na bwawa la walimu ambayo huchota kutoka humo, inaweza kuhitaji uteuzi wa bodi ili kusimamia mambo yake. Wakati kanda iliyopo chini ya uangalizi wa taasisi ni kubwa, inaweza kuwa na matawi yakihudumu maeneo maalum, kila moja likiwa na utawala wake.

Ili msukumo mpya katika uanzishaji wa taasisi ufanikiwe, ushiriki hai wa Washauri na Washauri Wasaidizi katika utendaji wao ni muhimu. Ushiriki kama huo utawasaidia Washauri kuwasha “Moto wa Upendo wa Mungu katika mioyo na roho hasa za watumisi Wake,” “kueneza Manukato Matakatiifu,” “kukuza roho za watu,” “kuendeleza ujifunzaji,” na “kuboresha tabia za watu wote.” Taasisi hizi zitawapa Washauri na Washauri Wasaidizi upataji wa haraka wa njia rasmi za kuwaelimisha waumini, zaidi ya njia zingine zilizopo kwao kama vile makongamano, shule za kiangazi na kukutana na marafiki. Taasisi zinapaswa zifikiriwe kama vituo vya ujifunzaji, na kwa kuwa tabia zao hupatana, na pia hutoa upeo kwa ajili ya utekelezaji wa majukumu ya kielimu ya Washauri Wasaidizi, tumeamua kwamba ushiriki wa karibu kabisa katika uendeshaji wa taasisi sasa uwe sehemu ya kazi zibadilikazo za maofisa hawa wa Imani. Washauri pamoja na Mabaraza ya Kiroho ya Kitaifa watahitaji kushauriana juu ya mambo ya tondoti za ushirikiano baina ya mikono hii miwili ya Utaratibu wa Utawala katika kusimamia bajeti na utendaji wa taasisi na katika kupanga maudhui ya program, kukuza mtaala na kutoa kozi. Bodi ya wakurugenzi ikiteuliwa, Baraza la Kiroho la Kitaifa kwa ushauriano na Washauri ndiyo wataamua nani wawe wajumbe na watawapa usaidizi kikamilifu. Washauri Wasaidizi wanaweza kuhudumu kwenye mashirika haya.

Zaidi ya kuwa na uhusiano wa kikazi na Washauri Wasaidizi, kwa umuhimu taasisi lazima ishirikiane kwa ukaribu na Mabaraza ya Kiroho ya Mahali pamoja na kamati zinazosimamia mipango na miradi ya upanuzi na uimarishaji. Hii itahakikisha kwamba program za taasisi zinabuniwa kusaidia kuwainua watu binafsi ambao wanaweza kuchangia kwa ufanisi kwenye mipango hiyo. Hata hivyo, hata kama mashirika haya ya kiutawala bado hayajakuza uwezo wa kutumia vipaji vya wale wanaopewa mafunzo, program za taasisi zinapaswa zitekelezwe mara kwa

mara. Hata hivyo, uimarikaji wa asasi katika kanda hutegemea, kama ilivyo kwa mambo mengine yote, juu ya wasaidizi wenye weledi na waliothibitishwa wa Imani.

Katika kuendeleza program zake, taasisi inapaswa ichote Kwenye vipaji vya idadi ikuayo ya waumini na pia itumie fursa ya uhusiano wake wa kiasasi kupata rasilimali katika ulimwengu mzima. Taasisi mpya itakayoanzishwa mara nyingi itatumia nyenzo zilizozalishwa na taasisi kutoka sehemu nyingine za ulimwengu. Pole pole, wale wanaobuni na kutoa kozi watajifunza jinsi nyenzo hizi zinavyoweza kujalizwa ili kukidhi vyema zaidi mahitaji yao mahususi na wataamua nyenzo gani mpya zinapaswa zibuniwe. Hivyo, mtaala wa taasisi kwa wakati wowote ule, unaweza kutumia vizuri mchanganyiko wa nyenzo zilizobuniwa katika maeneo yao na zile ambazo zimethibitika kufanikiwa kwingineko. Kadiri taasisi zianzavyo kushamiri, mitaala mbalimbali itakuzwa kwa ajili ya mahitaji ya mafunzo mbalimbali. Tunatumaini kwamba, kwa msaada wa Kituo cha Ufundishaji cha Kimataifa, mtaweza kutathimini nyenzo zinazopatikana kutoka wakati hadi wakati na kuzisaidia taasisi katika jumuiya mnazohudumia kuchagua zile zinazofaa zaidi kwa ajili ya mahitaji yao.

Tunatenga fedha na kuziweka chini ya mamlaka ya Kituo cha Ufundishaji zikikusudiwa mahususi kwa ajili ya uendeshaji wa taasisi na tunadhamiria kuyaomba Mabaraza ya Kiroho ya Kitaifa, kulingana na mazingira yao, kuweka uangalifu maalum kwenye maendeleo ya taasisi katika nchi zao. Ni matumaini yetu kwamba maendeleo ya maana katika muelekeo huu yatafanya mojawapo ya sura za kipekee za Mpango wa Miaka Minne.

Ngazi ya Mahali

Maendeleo ya jumuiya ya mahali na utendaji wa Baraza la Kiroho la Mahali zimekuwa ni changamoto endelevu kwa ulimwengu wa Kibahá'í kupitia Mipango inayofuatana. Kwa sasa, maelfu machache ya Mabaraza ya Kiroho ya Mahali yamefikia angalau kiwango cha msingi cha utendaji. Mipango ya kitaifa na kikanda kwa udhahiri itapaswa kujumuisha melekezo kwa ajili ya kutumiwa na Mabaraza hayo, katika mipango ya mahali ya upanuzi na uimarishaji. Ili kuhakikisha kwamba mipango ya mahali inachangia kwenye uendelezaji wa mchakato wa uingiaji kwa makundi, mtahitaji kuwaomba Washauri Wasaidizi wenu pamoja na wasaidizi wao kufanya kazi kwa ukaribu na Mabaraza haya, kwa yote mawili; katika uandaaji wa mipango na katika utekelezaji wake, kuwasaidia kubeba jukumu la ukuaji wenye mpangilio katika jumuiya zao na katika maeneo yaliyochukuliwa kama malengo ya nyongeza. Jumuiya lazima ijazwe hisia ya dhamira na Baraza linakua katika utambuzi wa wajibu wake kama mfereji wa rehema za Mungu si tu kwa Wabahá'í lakini kwa kijiji, mji au jiji linamohudumu.

Hata hivyo, katika zile jumuiya nyingi ambako hakuna shughuli zilizopangiliwa zinafanyika, iwe Baraza la Mahali limechaguliwa ama la, changamoto zaidi za kimsingi sharti zishughulikiwe, na katika hili Washauri Wasaidizi na wasaidizi wao lazima watimize jukumu la kimsingi. Jitihada za kutosha lazima zifanywe kuwasaidia waumini binafsi, wanaume na wanawake kadhalika, kuongeza upendo wao kwa Bahá'u'lláh na Hoja Yake na kuwaleta pamoja katika Karamu za Siku Kumi na Tisa hali kadhalika mikutano ya mara kwa mara inayokusudia kuinua ufahamu wao wa utambulisho wao kama jumuiya. Katika yale Maeneo ambapo ushiriki wa wanawake katika masuala ya kijumuiya unasuasua, hatua za makusudi sharti zichukuliwe ili kukuza ushiriki huo. Hatua zenye kufaa sharti zichukuliwe ili kwamba Baraza la Kiroho la Mahali lichaguliwe kikamilifu mwaka hadi mwaka na maendeleo thabiti ya utendaji wake yafanywe. Uendeshaji wa mara kwa mara wa madarasa ya Kibahá'í ya matoto sharti upewe kipaumbele cha hali ya juu. Hakika, katika sehemu nyingi za ulimwengu hii ndiyo shughuli ya kwanza katika mchakato wa ujenzi wa jumuiya, ambayo, ikifanywa kwa juhudi, itaibua maendeleo mengine. Katika yote haya,

uungalifu maalum huhitaji utolewe kwa vijana, ambao mara nyingi ndiyo wasaidizi wenye shauku wa Imani. Uanzishwaji wa shughuli hizi huelezea hatua ya kwanza katika mchakato wa maendeleo ya jumuiya, ambayo, mara yakifikwa, lazima yafuatiwe na hatua za baadaye hadi jumuiya imefikia hatua ambayo inaweza kuandaa mipango yake yenyewe ya upanuzi na uimarishaji.

Katika muktadha huu, tunaona kwamba Washauri Wasaidizi wanapaswa watumie fursa zaidi ya uwezekano wa kumteua, pale panapofaa, mmsaidizi zaidi ya mmoja kwa jumuiya husika, kwa kusudi la kumpangia kila mmoja kuendeleza moja au zaidi ya shughuli hizi za msingi za jumuiya. Pia tunawasihi mshauriane na Mabaraza ya Kiroho ya Kitaifa juu ya tajiriba ya jitihada za wakati uliopita za kuzisaidia jumuiya hizo. Kisha taratibu zinaweza kufanyika ili kile mlichojifunza kutokana na tajiriba hii kijadiliwe pamoja na wasaidizi amilifu wa Imani katika kila kanda, mkiwasaidia kubainisha mbinu na njia zinazofaa kwa mazingira yao mahususi na kuanzisha mchakato wenye mpangilio wa maendeleo ya jumuiya. Mchakato huu unapaswa uwe ule ambao marafiki hupitia upya mafanikio na changamoto zao, hurekebisha na kuboresha mbinu zao kadiri inavyofaa, na kujifunza na kusonga mbele bila kusita-sita.

Kwa jumla, tunaona kazi za Washauri Wasaidizi wa Ulinzi lazima zifafanuliwe na uwezo wao kuongezeka. Uimarishwaji wa marafiki na utendaji unaofaa wa Baraza la Kiroho la Mahali ni muhimu sana kwa ajili ya ukuaji mzuri wa jumuiya na sharti uwe miongoni mwa mambo muhimu ya Washauri Wasaidizi wa Ulinzi. Tunatazamia kuongeza idadi ya wajumbe wa Bodi za Ulinzi ili ilingane na ile ya Bodi za Upanuzi. Ni matumaini yetu kwamba wajumbe wa Bodi za Ulinzi, na wao watachagua wasaidizi zaidi ili kumakinikia juu ya masuala yanayohusiana na maendeleo ya jumuiya.

Uchaguzi wa Mabaraza ya Kiroho ya Mahali

Katika kukuza Utaratibu wa Kiutawala, Mlinzi aliiweka Siku ya Kwanza ya Ridván kama siku ambapo Mabaraza yote ya Kiroho ya Mahali yanapaswa kuchaguliwa. Wakati wa uhai wake, utaratibu huu ulifuatwa kadiri idadi ya Mabaraza ya Mahali yalivyoongezeka kwa umaduhuti na kufikia zaidi ya elfu moja.

Katika miongo miwili iliyofuatia Imani ilipanuka kwa kiasi kikubwa, hususan katika maeneo ya vijijini ya ulimwengu, ambako mara nyingi mbali na ni vigumu kufikika. Kwa kuzingatia maendeleo haya, mnamo mwaka 1977, Nyumba ya Haki ya Ulimwengu iliamua kwamba katika mazingira fulani fulani, wakati marafiki wenyeji wanaposhindwa kuchagua Baraza la Kiroho siku ya kwanza ya Ridván, wangeweza kufanya hivyo katika siku yoyote ifuatayo ya Sikuu kuu ya Ridván. Ruhusa hii haikuyahusu maeneo yote, bali kwa yale ambayo, kwa muono wa Baraza la Kiroho la Kitaifa, yaliathiriwa na mambo mahususi kama vile ujinga, umbali na kutofahamu vyema dhana za Utawala wa Kibahá'í. Nyumba ya Haki pia ilitoa ruhusa mwanzoni mwa Mpango wa Miaka Mitano kwa Mabaraza yanayochaguliwa kwa mara ya kwanza yachaguliwe wakati wowote katika mwaka.

Maelekezo haya yamewawezesha waumini katika maeneo mengi kupokea msaada katika kuchagua Mabaraza yao ya Kiroho ya Mahali, na tajiriba kubwa imepatikana katika kuyaimarisha Mabaraza ya Kiroho ya Mahali yaliyo katika hali anuwai katika mazingira mengi ya kitamaduni. Hata hivyo, kikanuni, ari na wajibu wa kuchagua Baraza la Kiroho la Mahali kimsingi ni wajibu wa Wabahá'í wa eneo hilo, na msaada kutoka nje hatimaye utazaa matunda pale tu marafiki watakapokuwa na utambuzi wa wajibu huu mtakatifu. Kadiri maendeleo yanavyofanywa katika kufunza rasilimali watu na katika kuendeleza uwanda mzima wa maisha ya jumuiya ya Kibahá'í, uwezo wa marafiki wa kuchagua Mabaraza yao ya Mahali wao wenyewe kwa hakika utakua.

Tukiwa na mawazo haya akilini, tumeamua kwamba, kuanzia Ridván 1997, utaratibu wa kuchagua Mabaraza yote ya Kiroho ya Mahali Siku ya Kwanza ya Ridván utarasimishwa tena. Tunatambua kwamba matokeo ya mara moja yanaweza kuwa kupungua kwa idadi ya Mabaraza ya Kiroho ya Mahali kwenye Ridván 1997, lakini tuna imani kwamba miaka ijayo itashuhudia ongezeko Madhubuti.

Mabaraza ya Kiroho ya Kitaifa na mawakala wao kwa upande mmoja, na Washauri na wasaidizi wao kwa upande mwingine, dhahiri wana jukumu la kukuza uanzishaji na uendelezaji wa jumuiya za Kibahá'í, zikiwemo asasi zao za mahali zilizoagizwa kitakatifu. Jukumu hili linaweza kutekelezwa kwa kiasi kikubwa kupitia program endelevu za kielimu ambazo hujenga ndani mwa waumini utambuzi wa umuhimu wa Mafundisho katika kila eneo la maisha yao binafsi na ya kijamii na ambayo husababisha ndani mwao shauku na dhamira ya kuyachagua na kuyasaidia Mabaraza yao ya Kiroho ya Mahali. Program hizi zinapaswa zitumie kikamilifu fursa za maelekezo ambayo yametolewa kwa ajili ya uundwaji kwa muda wa kamati za kiutawala zenye wajumbe watatu au zaidi katika maeneo ambako Mabaraza ya Mahali hayajachaguliwa au ambako wajumbe wa Baraza la Mahali hushindwa kukutana.

Mahitaji ya Kifedha

Wingi wa kazi ambazo jumuiya ya Kibahá'í inaitiwa kuzitekeleza wakati wa Mpango wa Miaka Minne utahitaji matumizi ya kutosha ya fedha. Mahitaji ya haraka ya Miradi ya Tao (Nusu Duara) yataendelea kuweka uhaba mkubwa kwenye Mifuko ya Kimataifa ya Imani. Hata hivyo, Nyumba ya Haki ya Ulimwengu itafanya kila iwezalo kuhakikisha Washauri na Mabaraza ya Kiroho ya Kitaifa wanakuwa na fedha zihitajikazo kwa ajili ya utekelezaji wa kazi za upanuzi na uimarishaji katika maeneo yanayohitaji msaada. Hii itajumuisha fedha kwa ajili ya kazi zote muhimu za Washauri Wasaidizi.

Hata hivyo, kama tajiriba ilivyoonesha, matumizi ya fedha yenyewe pekee yake, hayawezi kuleta matokeo. Changamoto zilizopo mbele yenu ni kusaidia kukuza uwezo wa asasi na mawakala mbalimbali wanaohusika katika utekelezaji wa Mpango kutumia fedha kwa namna yenye busara na ifaayo. Kwa nyongeza, lazima mzidishe juhudi zenu mara dufu kumuelimisha kila mshiriki wa jumuiya ya Kibahá'í—muumini mpya na wa zamani, kijana na mtu mzima—juu ya umuhimu wa kiroho wa kuchangia kwenye Mfuko. Tuna imani kwamba mtaweka uangalifu maalum kwenye changamoto hizi mbili wakati mnapoanza kuwasaidia marafiki katika kila bara kupata ushindi kwa ajili ya Hoja katika kipindi cha miaka hii muhimu katika historia ya binadamu.

Marafiki Wapendwa, miaka michache mifupi ambayo hututenganisha sisi kutoka kumalizika karne ni kipindi chenye yote mawili, nguvu za kiroho na fursa tele. Majukumu makubwa yapo mabegani mwenu. Wakatiwa miezi ya kwanza ya Mpango, mtakuwa mkitoa mchango wenye maamuzi kwenye uandaaji wa mipango ambayo itawahamasisha marafiki kutenda na itawaongoza katika jitihada zao za mtu binafsi na za pamoja. Katika kipindi chote cha Mpango, ninyi pamoja na wasaidizi wenu mtawatia moyo marafiki, kuchochea uwezo wa kiroho uliomo mioyoni mwao, na kuwasaidia kutimiza majukumu yao kuelekea Hoja waipendayo sana. Wakati mchukuapo majukumu haya mengi, lazima mtambue daima kuwa utambuzi wa shabaha ya Mpango wa Miaka Minne utategemea na ongezeko la kasi la idadi ya walimu wa Hoja ambao wataleta umati, kuwalea na kujaza ndani mwao “kwa kina sana shauku” kiasi cha kuwasukuma “kuinuka wao wenyewe” na kujitolea nguvu zao “kwenye kuhuisha roho zingine.”

Muwe na hakika kwamba tutamkumbuka kila mmoja wenu na wote katika Makaburi Matakatifu.

[Imesainiwa: Nyumba ya Haki ya Ulimwengu]

Waraka huu umepakuliwa kutoka Maktaba ya Marejeo ya Kibaha'i ([Bahá'í Reference Library](#)). Mko huru kutumia maudhui yake kwa kuzingatia masharti ya matumizi yake yanayopatikana kwenye tovuti: www.bahai.org/legal.